

Inatsisip atuutsinneqartup Naalackersuisut kingusinnerpaamik UPA 2017-imi allanngortinnissaanut siunnersuummik suliniuteqaqqullugit siunnersuut. Taamaaliornikkut ilagiit sinniisaannut qinikkatut sulineq allatulli qinigaaffittut atuutilerseqqullugu.

(Inatsisartunut Ilaasorta: Anthon Frederiksen, Partii Naleraq)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoq)

Siullermeerneqarnera

Ilagiit sinniisaannut qinikkatut sulineq allatulli qinigaaffittut atuutilerseqqullugu inatsisip allanngortinnissaanut aalajangiiffigisassatut siunnersuummut Naalackersuisut qujapput.

Aalajangiiffigisassatut siunnersuummi oqaatigineqarpoq ilagiit sinniisaanni ilaasortat kommunalbestyrelsini ilaasortat nunaqarfinnilu aqutsisut naligalugit isigineqartariaqartut. Ilumoorpoq, siunnersuuteqartup oqaatigimmagu ilagiit sinniisaanni ilaasortat kommunalbestyrelsini ilaasortatulli nunaqarfinnilu aqutsisutulli qinikkatut isigineqartanngitsut sulinerminnilu assigiimmik akissaasersorneqanngitsut. Naalackersuisut siusinnerusukku § 37 naapertorlugu apeqquteqaammik siunnersuuteqartumut kiisalu innuttaasut ilagiit sinniisaannut ilaasortat qinigaanersuutinik pissarsineq ajornerat pillugu saaffiginnisutaannut akissuteqarnikuupput. Naalackersuisut taakkununga akissutigaat, suliaaqaarfiit assigiinngitsorujussuit marluk assiginnigissutaasa isiginiartariaqarnera pineqartoq. Kommunalborgbestyrelsemi nunaqarfinnilu aqutsisunut ilaasortat ilaatigut nammineerlutik missingersuusiorsinnaatitaapput pisariaqartinneqartullu naapertorlugit annerusumik nammineersinnaatitaallutik, ilagiillu sinniisaannut naleqqiullugu annermik akisussaaffeqarput pisinnaatitaanerat inatsisitigut annerusumik pituttugaammat.

Ilagiit sinniisaannut ilaasortaaneq qinikkatut suliaqarnertut isigineqassappat taakku saniatigut ilaatigut suliamut pisussaaffeqartariaqarpoq, ilagiillu sinniisaannut ilaasortaanerme taamaattoqanngilaq.

Suliaqarfinnut allanut soorlu atuarfinni siulersuisuni angajoqqaatut sinniisutut suliaqarneq siunnersuisoqatigiinnilu assigiinngitsuni ilaasortatut sulineq assersuutigalugu Meeqqat siunnersuisoqatigiivini qinikkatut sulialittut pisinnaatitaaffeqanngitsunut assersuutaalluarput.

Taamaattumik Naalackersuisut isumaqarput, ilagiit sinniisaannut qinersinissami tullermi ilagiit sinniisaanni sulineq akissarsiaqarnani sulinerummat erseqqissarneqarnissaa pingaaruteqartoq. Taamaalillutik suliamik soqutiginnittut eqqortumik paasinnissimallutik suliamik aallartitsisinnaassapput, nammineq kajumissuseq, akissarsiaassartaqanngitsoq pineqartoq, suliarlu tunniussaqaarfiusoq, tamannalu aqutigalugu ilagiit tamarmiullutik sulilluarnerat takutillugu.

Nammineq kajumissutsimik tunngaveqarnerup attatiinnarneqarnissaa oqaatigineqareersutut kissaatigineqarpoq, aningaasartaliisoqassappalli ukiumut aningaasartuutit 11 mio kr.-it pineqassagaluarput, ilagiit sinniisaanni ilaasortat 275-iusut tamarmik immikkut assersuutigalugu ukiumut 40.000 kr.-inik akissarsiaqartinneqassagaluarpata.

Naalackersuisut tamakku tunngavigalugit aalajangiiffigisassatut siunnersuut tapersersinngilaat, periarfissarli iluatsillugu ukiut ingerlaneranni nuna tamakkerlugu ilagiit sinniisaanni nammineq kajumissutsiminnik sulisimasut qujaffigerusullugit.